

Obraćanje prvog zamjenika visokog predstavnika i supervizora za Brčko Michaela Scanlana povodom Dana Distrikta Brčko



Brčko, 8. mart 2020. godine

Uvaženi gošti,

Dame i gospodo,

Dozvolite mi da vam čestitam Dan Brčko Distrikta.

Uz brojne predstavnike lokalnih organa vlasti i građane koji su danas ovdje s nama, dozvolite mi da pozdravim i člana Predsjedništva BiH gospodina Džaferovića, predsjednicu Republike Srpske gospodu Cvijanović, premijera Federacije BiH gospodina Novalića i druge uvažene zvaničnike, kao i predstavnike naših partnera iz međunarodne zajednice.

Prije samo godinu dana, stajao sam ovdje i s vama podijelio viziju onoga što bi Brčko moglo biti. Od tada sam Brčko posjećivao svaki mjesec, još više ohrabren mnogim događanjima spremnim da tu viziju pretvore u stvarnost.

Naišao sam na opći konsenzus da se stvari moraju mijenjati, da se jedinstvene prednosti koje Brčko ima moraju iskoristiti kako bi se mladim generacijama vratila vjera da je njihova

budućnost ovdje, u Distriktu.

To je razumljivo jer su obimni resursi Distrikta često bili loše iskorišteni. Uprkos najvećem budžetu *per capita* u regionu, zgrade u kojima su smještene javne institucije u Brčkom nisu renovirane kako bi bile energetski efikasne. Ovim bi se osiguralo da je u bolničkim sobama, školskim zgradama i radnim prostorima uvijek toplo.

Renoviranje 187 javnih objekata u Distriktu koštalo bi oko 28 miliona KM. To znači da je tokom svake od proteklih osam godina bilo potrebno izdvajanje od samo 3,5 miliona KM godišnje, pri čemu bi se osigurale finansijske uštede u budžetu.

Ali, ima i dobrih vijesti: U posljednjih nekoliko mjeseci, organi vlasti su radili bržim tempom kako bi se kvalificirali za UNDP-ovu inicijativu za energetsku efikasnost. Koliko brzo će Brčko sada napredovati zavisi isključivo od toga kako će organi vlasti odlučiti da iskoriste ogroman budžet Distrikta koji iznosi 256 miliona KM. Ovo je samo jedan od primjera kako javni zvaničnici mogu i trebaju koristiti resurse, koje osigurava jedinstveni koeficijent Brčko Distrikta, da ulaze u budućnost kakvu stanovnici Distrikta zaslužuju.

Ne radi se samo o tome da se promijeni višegodišnji negativni trend nego da se donesu odluke zbog kojih će okruženje u Brčko Distriktu biti jedno od najboljih okruženja za život i rad u Bosni i Hercegovini.

Na Dan Brčko Distrikta, sa zadovoljstvom mogu reći da su vodeći zvaničnici Distrikta – predsjedavajući Skupštine Kadrić, zamjenik predsjedavajućeg Filipović, gradonačelnik Milić i zamjenik gradonačelnika Domić – svi odgovorili na izazove da preuzmu reformski proces u svoje ruke. A taj proces – kao što su i prepoznali – zahtijeva ne samo političku volju, mudrost i hrabrost nego i širu podršku. Samo zajedničkim radom svih možemo napredovati ka ponovnom oživljavanju ove nekada

dinamične sredine.

Ove godine će biti moguće postići konkretni napredak u Brčkom, ukoliko organi vlasti nastave usvajati potrebne zakone.

Dobra početna tačka je novi Zakon o budžetu, usvojen u decembru prošle godine, s obzirom da omogućava odgovorno, transparentno i ciljano korištenje javnih sredstava. Političko rukovodstvo Distrikta ima šansu da pokaže svoju opredjeljenost za poštivanje ovih vrijednosti, koristeći ih za vođenje procesa usvajanja budžeta za 2020. godinu tokom ovog mjeseca. Usvajanje novog Zakona o fondacijama i udruženjima tokom proljeća dodatno će doprinijeti ovim ciljevima, dok bi ljetom trebalo donijeti napredak u nekoliko oblasti čime bi se stimuliralo poslovanje u Distriktu.

U najmanju ruku, ovog ljeta trebali bismo vidjeti početak građevinskih radova na modernizaciji Luke, završetak ključnih studija koje će biti osnova za rekonstrukciju mosta Brčko-Gunja i usvajanje niza mjera koje pogoduju vođenju poslovanja, a usmjereni su na privlačenje investicija, širenje poslovanja i otvaranje radnih mesta, kao i na povećanje javnih prihoda.

Ove tekuće reformske aktivnosti o kojim govorim pružaju šansu političkim strankama i njihovim predstavnicima da ove jeseni svoju predizbornu kampanju zasnivaju na platformi konkretnih rezultata, ali to znači da Vlada i Skupština moraju raditi sve do izbora.

Istovremeno, građani Distrikta moraju svoje izabrane zvaničnike smatrati odgovornim za dobro rukovođenje, što treba biti isključivi kriterij na osnovu kojeg će glasati na izborima. Građani bi također trebali ukazivati na korupciju i tražiti odgovornost za korupciju kad god primijete takve slučajeve, a organi za provedbu zakona i pravosuđe moraju u takvim slučajevima uraditi svoj dio posla. U tom smislu, Brčko Distrikt treba biti model za ostatak Bosne i Hercegovine.

Pri tome je najvažnije da će ovaj dugoočekivani i ključni

napredak vratiti osjećaj nade i osigurati podsticaj za mlađe ljude u Brčkom da ostanu ovdje, pokrenu firme i da ovdje podižu porodicu. Ko ne bi želio živjeti u ekonomski dinamičnoj zajednici koja nudi dobra radna mjesta, odličnu infrastrukturu i brojne kulturne, sportske i zabavne sadržaje?

Dakle, dozvolite mi da još jednom građanima Brčkog uputim čestitke povodom Dana Distrikta, ali dozvolite mi i da rukovodećim ljudima Distrikta uputim izazov da nastave raditi kako bi se situacija razvijala u pravom smjeru, u atmosferi tolerancije i saradnje.

Uvjeren sam da ste svi vi spremni prihvati ovaj izazov, u interesu ove jedinstvene zajednice.

Na kraju, s obzirom da je danas i Međunarodni dan žena, dozvolite da svim pripadnicama ljepšeg spola u Brčkom, koje su prijeko potreban partner u izgradnji budućnosti Distrikta, čestitam njihov dan.

Hvala.